

## **ODRŽANA SEDMA SJEDNICA ODBORA ZA ODNOS SA LOKALNOM ZAJEDNICOM**

U sali Općine Vareš, 29.10.2021.godine, kompanija Eastern Mining održala je sedmu po redu sjednicu Odbora za odnose sa lokalnom zajednicom (PLC). Dnevni red sjednice započeo je razmatranjem zapisnika i zaključaka sa prethodne tj. šeste sjednice PLC-a, a zatim su predstavnici kompanije Eastern Mining predstavili aktivnosti koje su se desile u prethodnom periodu uz kratak osvrt na planirane aktivnosti. Obzirom da je završena Procjena uticaja na okoliš i društvo (ESIA) na kojoj se radilo osamnaest mjeseci, na sjednici je održana prezentacija ESIA-e te dostavljen Netehnički sažetak u vidu brošure koji sadrži osnovne sažete informacije iz Procjene uticaja na okoliš i društvo koje su važne za stanovništvo područja općine Vareš. Kao na prethodnim i na sedmoj sjednici Odbora za odnose sa lokalnom zajednicom članovima su pružene transparentne i najvažnije informacije o aktivnostima kompanije Eastern Mining, a pružena je i prilika da članovi postave pitanja te iskažu svoje mišljenje o temama koje su za njih kao predstavnike različitih organizacija i zajednica ključne.



## **PROCJENA UTICAJA NA OKOLIŠ I DRUŠTVO - ESIA**

Studija Procjene uticaja na okoliš i društvo (ESIA) urađena je nakon osamnaest mjeseci intenzivnog rada, monitoringa i prikupljanja podataka. Procjena uticaja na okoliš i društvo definiše trenutne okolišne i društvene uslove na cijelom području Projekta te određuje metode otklanjanja, ublažavanja i upravljanja uticajima u skladu sa najboljom međunarodnom praksom i njenim standardima kao i odredbama i smjericama Europske banke za obnovu i razvoj (EBRD).

U periodu od 60 dana od objave studije bit će organizovani sastanci sa svim zainteresovanim stranama kako bi bili upoznati sa osnovama studije te kako bi imali mogućnost da daju svoje povratne komentare na istu. Svi zainteresovani studiju Procjene uticaja na okoliš i društvo te povezane dokumente i priloge mogu pronaći na web stranici kompanije Eastern Mining kao i u Informativnom centru kompanije.

## **PROJEKAT RENOVIRANJA DJEČIJEG PARKA U VAREŠ MAJDANU**

U saradnji sa organizacijom Alterural i općinom Vareš, kompanija Eastern Mining je učestvovala u projektu obnove dječijeg parka u Vareš Majdanu. Kompanija je još jednom pokazala svoju društvenu odgovornost te je posebno ponosna na projekat koji je djeci Vareš Majdana vratio osmijeh na lice. U skladu sa svojim mogućnostima dajemo primjer i drugima koliko je važna podrška lokalnom razvoju i poboljšanju društveno-ekonomskih prilika.



## INTERVJU SA JASMINKOM ZUKIĆ – LIVING HISTORY PROJECT

**Koristim priliku da Vam se zahvalim na tome što ste pristali govoriti za naš Living history project. Za početak ću Vas zamoliti da nam se predstavite.**

Ja se zovem Jasminka Zukić, diplomirani sam inženjer geologije i nastavnik predmetne nastave matematike i fizike. Fakultet geologije sam završila u Tuzli, a matematiku i fiziku u Mostaru. Radila sam u Energoinvestu skoro tri godine i kada je Energoinvest prestao sa radom, poslije rata sam počela raditi u prosvjeti.

**Šta je bio Vaš prvi posao?**

Moj prvi posao je bio u Energoinvestu, ja sam bila njihov stipendista. Deset mjeseci nakon diplomiranja počela sam raditi u Energoinvestu kao inženjer geologije.

**Koliko je osoba bilo zaposleno Vašem sektoru?**

U geološkoj službi nas je bilo 5, tri inženjera, jedan tehničar i šef službe.

**Da li se možete sjetiti koliko je ukupno osoba bilo zaposleno u tadašnjem rudniku Energoinvesta?**

Oko 300 osoba je bilo zaposleno u tom periodu.

**Je li neko od članova Vaše porodice ili rodbine radio u Energoinvestu?**

Da, moj otac. On je radio kao profesionalni vozač i kao šef službe za održavanje.

**U vremenu kad ste Vi radili u Rudniku olova, cinka i barita, u kojoj mjeri su bile zaposlene žene?**

Bilo je zaposlenih žena u zavisnosti od službe. Na primjer, u geološkoj službi su bile četiri žene, u geodetskoj dvije i također u laboratoriji su većinom radile žene. Zatim u kuhinji i na higijenskom održavanju.

**Šta Vam se najviše sviđalo u tom poslu?**

Bilo je sve organizovano, omogućeno, svu opremu također. Mi, geolozi, smo svaki dan trebali ići na teren i pratiti radove. Imali smo obezbjeđen prevoz za sve aktivnosti. Obezbjeđen nam je i sav potreban geološki materijal.

**Kad pogledate na život nekad i sad na području općine Vareš, možete li napraviti poređenje?**

Tu nema poređenja, po mom mišljenju. U to doba je bilo jako teško naći stan jer je bio veliki broj stanovnika, razne firme su radile, ko god je htio raditi imao je posao. Poslije školovanja, većina je odmah imala posao. Plate su bile redovne, također. Sve je nekako bilo uredno, tako bih rekla.

**Kako je Vareš izgledao na vrhuncu svoje moći?**

Danas je Vareš neprepoznatljiv. Prije je bilo mnogo više stanovnika. U Varešu je bilo i mnogo aktivnosti za mlade, ja sam na primjer, trenirala košarku i bila sam član streljačkog kluba. Grad je nudio raznovrsne sadržaje za sve stanovnike. A i na selima su bila razna druženja i igre pa smo tako posjećivali sela, družili se. Život je bio kvalitetan, ukratko.

**U toku rada Rudnika i Željezare, da li se pridavalo značaja zaštiti okoliša i da li su se poštivali tadašnji zakoni te oblasti?**

Zakoni su se poštivali i vodilo se računa o okolišu. Čim se desio neki problem, odmah se i rješavao.

**Imate li neku poruku za mlade ljude koji tek počinju da grade svoje karijere?**

Mladim ljudima bih preporučila da što više uče, da se trude i rade i budu vrijedni i poštenu ljudi jer se to sve na kraju i isplati. Neka pokušaju da ostanu ovdje, da ne idu vani jer ipak je najljepše kod kuće, sa porodicom. Ako iko može popraviti stanje, to je omladina.

